

Ke Neuna ne Surat ni Pablo Riyà te Menge Eteu te Inged ne Tiselunika

1 ¹ Siaken ne edsurat ini ne si Pablo duma ni Silvanu wey si Timoteo. Ne idsurat dey ini diyà te keniyu te inged ne Tiselunika ne mibperetiyaya te Eleteala ke Amey tew wey ki Hisu Kristu ke Kerenan tew.

Iyan dey kiyug ne egkeheram niyu ke tavang wey kebmelinew te itungan niyu ne riyà ebpuun te Eleteala.

² Su sikami, ne layun dey ebpelelemati diyà te Eleteala mekeatag te langun niyu wey layun dey idragkes sikiyu te kebpengeningeni rey.

³ Su uman key ebpengeningeni mekeatag keniyu diyà te Amey tew ne egketenuran dey ke meupiya ne ed-ul-ulaan niyu su tuus te mibperetiyaya kew iya ki Hisu Kristu. Ne egketenuran dey rema ke dekelà ne limù niyu kandin ne egkekita te meilut se gelevek niyu kandin. Ne kenà dey egkelipatan ke kedtigker niyu te keresayan su dekelà ne ebpenerengen niyu ne edlived si Hisu Kristu ke Kerenan tew kayi te ampew te dunya.

⁴ Netuenan dey, menge suled, ne ingkelimù kew te Eleteala su sikandin se mibpemilì keniyu ne egkevaluy ne menge etew rin. ⁵ Netuenan dey ini su ke kebpemesabut dey dut te Meupiya ne Tudtul riyà te keniyu ne kenà kayi te lalag dey rà, ugaid ne midumaan dut te gehem te Kedesenan ne Ebpetuntul te Menusiyà. Ne neheram niyu ini, tembù be mibperetiyaya kew rut te kebpemesabut dey. Ne nekita niyu rema ke meupiya ne betasan dey te riyà key med-ubpà te keniyu su langun ne mid-ulaula rey ne ke keupianan niyu. ⁶ Ne sikami se mid-iringan niyu wey ke Kerenan tew ne si Hisu Kristu. Ne miduma kew rut te insuhù ne Lalag te Eleteala misan mibpekesekitan kew, su nengehalew kew egenat dut te Kedesenan ne Ebpetuntul te Menusiyà. ⁷ Tembù be sikiyu se nevaluy ne egkeiringan dut te mibperetiyaya diyà te inged ne Mesidunya wey Gerisiya. ⁸ Su ibpepevyà te kebpereiyaya niyu ne nekeeneb en ke Lalag te Eleteala

diyà te minge etew te inged ne Mesidunya wey Gerisiya. Ne kenà riyà dā te kandan su medmerakel pā ne minge inged se nekerineg dut te kebperetiyaya niyu te Eleteala. Tembū be misan kenà dey en ibpenudtul, ne netuenan dan en. ⁹Su sikandan en se ebpmenuudtul mekeatag te kegalāhalā niyu kenami ketā te kebpekeuma rey keniyā te keniyu. Ne ebpmenuudtul dan mekeatag dut te kebpekeengked niyu te ebpengarap te ledawan dā ne kenā tidtu ne Eleteala su apey kew ebpengarap dut te tidtu ne Eleteala ne warā kemetayen din. ¹⁰Ne ebpmenuudtul dan dema mekeatag dut te kebpenareng niyu te kedlived te Anak din ne si Hisu Kristu ne egenat diyà te langit. Su si Hisus ini ke mibanew rin, ne sikandin ke ebpeiyu keyta su apey kenā kiyu edusaan te Eleteala ketā te hewii ne egkukumen din en ke kelibutan.

Ini ne Mekeatag te Helevek ni Pablo Riyà te Inged ne Tiselunika

2 ¹Menge suled, netuenan niyu te kinepengkeniyān dey te keniyu ne neketavang keniyu su nevaluy ne keupianan niyu. ²Ne netuenan niyu rema ke egketemanan dey diyà te inged ne Pilipus te warā key pā mekepengkeniyān te keniyu, su mibpekesekitan key nikandan wey mibpegkeyā key. Ugaid ne misan iring ketā ne ke Eleteala se midtavang kenami, su mibag-et din ke hinawa rey te ebpengkeniyān ne ebpesabut keniyu dut te Meupiya ne Tudtul ne riyā ebpuun te kandin. ³Su ini se impesabut dey keniyu ne kenā egenat te tarū etawa iyan dey lakew se meraat, ne kenā dema ralan te ked-akal dey keniyu su impesabut dey ke benar ne penurū. ⁴Su ini se impesabut dey keniyu ne iyan insuhū kenami te Eleteala, su sikandin se mibpemili kenami ne insarig din kenami te ebpmesabut dut te Meupiya ne Tudtul mekeatag ki Hisus. Tembū be ini se impemesabut dey su apey ebpekesuhat te hinawa te Eleteala ne kenā ke minge etew rā. Ne netuenan te Eleteala ne benar ini su netuenan din ke engkey se kayi te hinawa tew. ⁵Netuenan niyu ne metidtu se kedlalag dey keniyu ne kenā dey midigdig dā sikiyu su apey niyu edumai ke ebuyuen dey, ne kenā ki engkungkun ne meupiya su apey ruen egkekuwa rey. Netuenan te Eleteala te benar ini. ⁶Kenā ke kedeyua niyu kenami etawa ke kedeyū te ruma ne etew se mibpemengā dey, ⁷misan sikami ke kedserihan ni Hisu Kristu ne dait ne edeyuen niyu. Warā dey ul-ulaa se iring ketā, ugaid ne midtuganur dey sikiyu iring te metulanged ne iney ne edtuganur te minge anak din. ⁸Ne geina te dekelā se limū dey keniyu ne kenā ke Meupiya ne Tudtul rā ne egenat te Eleteala se impesabut dey, su nepenehana rey te ebpatay su apey niyu egketueni mekeatag te Eleteala. Su dekelā dey sikiyu te hinawa rey. ⁹Ne egketenuran niyu red buwa, minge suled, ke ralan te kebmentiyari rey su merukilem meandew ne migelevek key su apey warā keniyu ebpekevayad te kegkeuyag dey te kebpmesabut dey te Meupiya ne Tudtul ne riyā egenat te Eleteala.

¹⁰Su ketà te riyà key pà te keniyu ne netuenan niyu wey ke Eleteala rema ne netuenan din te meupiya se ed-ul-ulaan dey keniyu ne minge mibperetiyaya. Warà igkesawey te ed-ul-ulaan dey su mid-ulaula rey ke ebpekesuhat te hinawa te Eleteala. ¹¹Ne netuenan niyu te uman seveka keniyu ne midtevangon dey iring dut te amey ne edtavang te minge anak din. ¹²Su mibag-et dey ke itungan niyu, ne midlangan dey ke hinawa niyu wey mibpenurù key te ed-ul-ulaan niyu ke engkey se ebpekesuhat te hinawa te Eleteala. Su nepemilì kew nikandin su apey kew mekeamung dut te Edetuan din wey ke kedeyua kandin.

¹³Ne egkehiyen ku maa te layun dey ebpelemati te Eleteala te midtelimà kew te Lalag din. Su ketà te kebpsabut ku kayi riyà te keniyu ne warà niyu kehiya te lalag ini ne mibèbeelan dà te etew, ugaid ne mibpeminég kew ne midtelimà kew te ini ne Lalag iya te Eleteala. Su ini se Lalag din, ne ruen gehem din te edtavang te minge mibperetiyaya su apey ran ed-ul-ulaa ke engkey se metidtu. ¹⁴Ne ini se netemanan niyu, minge suled, ne nekeiring dut te netemanan te minge etew te Eleteala ne mibperetiyaya ki Hisu Kristu diyà te minge inged te Hudiya. Su mibpekesekitan kew rut te minge ruma niyu te inged iring dut te kebpsesekiti kandan dut te minge ruma ran ne Hudiyänen ketà te inged ¹⁵ne iyan mid-imatey ki Hisus ke Kerenan tew wey ke minge mibpelambas te Lalag te Eleteala rengan, wey mibpekesakit keyta. Tembù be neumanan ke keepes te Eleteala kandan! Egkunteraan dan te langun ne minge etew! ¹⁶Su ibpeengked dan perem ke kebpsesabut dey te Meupiya ne Tudtul mekeatag ki Hisus dut te minge etew ne kenà Hudiyänen su apey egkepeneheewit dan te kebpseliyu ran. Tembù be mid-umanan ke salà dan taman te neuma ke edtemanán din. Ne nekeuma en ke epe te Eleteala kandan!

**Ini ne Mekeatag te Kegkelimengawi ni Pablo dut te
Minge Mibperetiyaya diyà te Inged ne Tiselunika**

¹⁷Minge suled, misan warà pà meuhet ke kineawà dey keniyán te keniyu ne egkelimengawan key nevenar keniyu. Ugaid ne misan warà key en keniyán, ne kayi kew red lavew te itungan dey. Ne egkiyuhan dey nevenar te ebpekebalak kiyu maa. ¹⁸Su egkiyug key ne ebpepengkeniyán te keniyu, ne siaken embe iya si Pablo se egkiyug nevenar. Merakel en ne hewii ne ebpepengkeniyán a perem, ugaid nevangan key dut te datù te pekaid. ¹⁹Benar ini, su ke kebpsperetiyaya niyu rut te Lalag te Eleteala ne impesabut dey se inlalew kenami wey ibmehalew rey. Ne sikiyu iyan se kenà dey igkeyeyai, ugaid ne idantal dey mekeatag te kebpsperetiyaya niyu diyà te etuvangan te Kerenan tew ne si Hisus ketà te hewii ne kedlived din kayi. ²⁰Uya, sikiyu se puunan te idantal dey mekeatag keniyu wey sikiyu se igkehalew rey.

3 ¹Ketà te kenà dey en egketigkeran ke kegkelimengawi rey keniyu, ne netahù te itungan dey te ebpelintetahak key diyà te inged ne Etenas ²ne ibpempengkeniyan dey te keniyu si Timoteo ne suled tew ne sugsuhen te Eleteala ne edtavang kenami te kebpepemesabut dut te Meupiya ne Tudtul mekeatag ki Hisu Kristu. Su midsuhù dey sikandin te ebag-et te hinawa niyu wey ebpeiseg dut te kebperetiyaya niyu, ³su apew warà keniyu ne ed-engked dut te kebperetiyaya sabap dut te kebpekesekiti keniyu ketà te inged. Su netuenan niyu en te ruen kebpekesekiti keyta ne idtuhut te Eleteala ne ebpekeuma kayi te keyta. ⁴Su gewii te keniyan key pà te keniyu ne impemenudtul dey neraan te ruen kebpekesekiti keyta, ne netuenan niyu te benar su ned-ulaula en ini. ⁵Tembù be ketà te nerineg ku mekeatag te kebpekesekiti keniyu ne warà a meketigker, ne impepengkeniyan ku si Timoteo su apew ku metueni mekeatag dut te kebperetiyaya niyu. Su neuru ad su kalu ke negaga kew en rut te penggeram ni Setanas ke datù te pekaid, ne ketà ne ke helevek dey te ebpepemesabut te Lalag te Eleteala ne warà atag din.

⁶Na guntaani ne mid-uli en si Timoteo se ed-ewit te meupiya ne tudtul mekeatag keniyu. Su impenuudtul din te mid-iseg pà ke kebperetiyaya niyu wey engketà ded dema ke kedlimù niyu dut te menge ruma niyu. Ne impenuudtul din ded te layun niyu red egketenuri te sikami ne egkiyuhan niyu te ebpekibalak, iring te sikami rema ne egkiyuhan dey ne ebpekekegkita kiyu. ⁷Tembù be, menge suled, behahren te nerasey key wey mibpekesekitan key, su nevag-et se hinawa rey ketà te nerineg dey te mid-iseg se kebperetiyaya niyu. ⁸Su guntaani ne iring key te midluungan te melihet ne kumbalà su netuenan dey te meilut pà ke kebperetiyaya niyu ki Hisu Kristu ke Kerenan tew. ⁹Kenà dey egketuenan ke edlelahen dey te dekelà ne kebpepelemati rey te Eleteala mekeatag keniyu, su ke igkehalew rey ne ebpuun kandin ne rekdekelà su atag dut te meilut ne kebperetiyaya niyu. ¹⁰Ne merukilem meandew ne layun key ebpengeningeni te ebpepekebalak kiyu, su apew rey ed-umani embiya ruen kurang dut te kebperetiyaya niyu.

¹¹Ne guntaani ne ibpengeningeni rey te Eleteala ne Amey tew wey ki Hisu Kristu ne Kerenan tew te ebpenehana te ralan te kebpepengkeniyan dey te keniyu. ¹²Ne ibpengeningeni rey lavew te Eleteala ne ed-umanan din pà ke kebpepelimlimuey niyu wey ke limù niyu te piya engkey ne etew iring dut te kerekelà te limù dey keniyu. ¹³Su embiya iring ketà se limù niyu, ne ebeheren din ke hinawa niyu su apew niyu ed-ul-ulaa ke engkey se ebpekesuhat te hinawa dut te Amey tew ne Eleteala. Ne ketà ne ebmetilak kew riyà te etuvangan din su apew warà idsawey rin keniyu dut te hewii ne edlived si Hisu Kristu ne Kerenan tew ne edumaan dut te langun ne menge etew rin.

Ini ne Mekeatag dut te Menge Ulaula ne Ebpekesuhat te Hinawa te Eleteala

4 ¹Na menge suled, ketà te keniyan key pà te keniyu ne impenurù dey en keniyu ke engkey se ulaula te ked-ubpà ne ebpekesuhat te

hinawa te Eleteala, ne ini ne midumaan niyu en. Ne guntaani ne ebuyuen dey te umani niyu pà ke meupiya ne ulaula niyu su ini se migkahi keyta rut te Kerenan tew ne si Hisu Kristu. ²Su netuenan niyu te iyan dey impenurù ne arà se impenurù dut te Kerenan tew ne si Hisus.

³Ne ini se kiyug te Eleteala ne engked kew rut te piya engkey ne ulaula ne meraat wey pekeriyù kew rut te kebpengingniyug. ⁴Sikiyu ne menge meama, ne iyan nu ul-ulaa diyà te esawa nu ke edait diyà te etuvangan te Eleteala wey edait diyà te etuvangan te menge etew. ⁵Su apey ke ulaula niyu ne kenà iring dut te menge etew ne kenà ebperetiyaya te Eleteala ne iyan ebayàbayà kandan ne ke kiyug te lawa ran. ⁶Tembù be uram kew su apey kew kenà ebpekedsalà diyà te menge ruma niyu su iring kayi ne egkepenggiekan niyu ke kevenar dut te ruma niyu. Su egketenuran niyu red te imbaag dey keniyu te piya engkey ne ed-ulaula te iring ketà ne edusaan dut te Eleteala ne Kerenan tew. ⁷Su ke Eleteala ne kenà din iyan kebpemili keyta ne egkevaluy ki ne menge anak din ne ed-ulaula te meraat, ugaid ne apey ta iyan ed-ul-ulaan ne ke metilak diyà te etuvangan din. ⁸Tembù be ke etew ne kenà eduma te ini ne ibpenurù ku ne kenà penurù te etew se id-engkenà din su iyan din id-engkenà ke penurù te Eleteala ne mibehey keniyu te Kedesenan ne Ebpetuntul te Menusiyà.

⁹Na mekeatag be dut te kebpelimlimuey niyu te menge ruma niyu ne mibperetiyaya, ne kenà en dait ne edsurat a pà keniyu su ke Eleteala se mibpenurù keniyu mekeatag te kedlimù niyu. ¹⁰Ne benar ini su kenà ke menge ruma niyu rà kenyan te inged niyu, ugaid ne langun ne menge etew te ruma pà ne inged te Mesidunya. Ugaid ne iyan dey ebuyuen, menge suled, ne ed-ilutan niyu pà ke kebpelimlimuey.

¹¹Ne ruen ruma pà ne ebuyuen ku te iyan niyu itahù te hinawa ne kemelinew ne betasan. Ne kenà kew ed-amung-amung te ulaula te menge ruma niyu, ugaid ne peketehele kew se egeleveke su apey ruen keuyahan niyu iring dut te impenurù dey keniyu. ¹²Su embiya ini se ed-ul-ulaan niyu ne kenà kew ebpekevuyù te igkeuyag niyu diyà te menge ruma niyu, ne egkereyù kew rut te menge etew ne warà pà mibperetiyaya.

Ke Kepenurù Mekeatag dut te Kedlived ni Hisus

¹³Menge suled, duen pà egkehiyen dey su apey niyu egketueni ke engked-ulaula dut te menge mibperetiyaya ne minatey en. Ibpenuudtul dey ini su apey kew kenà egkeuru iring dut te menge etew ne warà ebpenerengen dan ne umur ne warà edtemaninan din. ¹⁴Su sikita ne mibperetiyaya ki te minatey si Hisus, tembù be ebperetiyaya ki te ke menge mibperetiyaya kandin ne minatey en ne ebenawen te Eleteala su apey ran ebpekeruma ki Hisus ketà te kedlived din kayi.

¹⁵Ini se impenurù dut te Kerenan tew ne si Hisus ne ibpenudtul dey keniyu: embiya kenà ki pà ebpatay dut te hewii te kedlived din kayi,

ne kenà sikita se egkeuna te ebalak kandin dut te minge ruma ta ne mibperetiyaya ne minatey en su ebpekeredsà ki. ¹⁶Su iyan egked-ulaula te arà ne hewii ne ed-umewan dut te Kerenan tew ke minge mibperetiyaya diyà te kandin. Ne egkerineg ta rema ke ked-umew rut te pinekemepurù ne suluhuen te Eleteala wey ke dahing dut te budyung te Eleteala. Ketà ne ebpemenaug si Hisu Kristu ke Kerenan tew ne ebpuun te langit. Dutun ne egkeuna egkevanew ke langun ne mibperetiyaya ne minatey en. ¹⁷Egkeipus arà ne edtawehen ni Hisus ke langun ne mibperetiyaya ne warà pà minatey, ne ebpekeruma ran dut te behu pà ne nevanew en diyà te sehulapun su apey ran ebpeketelavuk dut te Kerenan tew diyà te kewkewangan. Ne diyà ki te kandin taman te taman. ¹⁸Tembù be, ini ne impesabut ku keniyu ne ibpenurù niyu te minge ruma niyu ne mibperetiyaya su apey ran kenà egkeuru.

**Ini ne Mekeatag te Kebpenehana tew rut te
Kedlived ni Hisus Kayi te Ampew te Dunya**

5 ¹Menge suled, embiya mekeatag te hewii ne kebpekeuma ni Hisu Kristu su egkukum dut te minge etew, ne kenà en dait ne idsurat ku pà. ²Su netuenan niyu en te egketekew se Hewii te kebpekeuma rut te Kerenan tew iring dut te kebpekeuma te tekawen te merukilem ne kenà egketuenan. ³Su ketà te hewii te kedlived ni Hisus ne iyan itungan te minge etew ne ebmelinew se ked-ubpà dan ne warà igkeuru ran. Ugaid ne egketekew ne ebpekeuma ke kegkereeti kandan ne warà ralan te kebpekeliyu ran. Su ke kebpekeuma dut te kegkereeti kandan ne iring te egketekew ne ebpekeuma ke belilit te meritan ne ed-anak.

⁴Ugaid ne sikiyu, minge suled, ne warà kew en med-ubpà diyà te kerusireman iring dut te minge etew ne kenà ebperetiyaya ki Hisus. Tembù be ketà te ebpekeuma arà ne hewii ne kenà niyu en igketekawi iring dut te etew ne warà mebpenehana te kebpekeuma dut te tekawen. ⁵Su langun te sikita ne mibmerayag en ke itungan ta ne kenà iring dut te merusirem ne itungan te minge etew ne kenà ebperetiyaya ki Hisus. ⁶Tembù be iyan iya se kenà ki ed-iring dut te minge etew ne edlipereng, ugaid ne ibpelevundus ta ke meupiya ne ulaula ta wey ebpenehana ki rut te kebpekeuma rin. ⁷Su iyan dà dait ne idlipereng te minge etew ne merukilem. Ne ketà dema ne nelayaman te minge etew te egkehubug. ⁸Ugaid ne nekevira en ke sikita ne mibperetiyaya ki Hisus su mibmerayag en ke itungan ta. Tembù be ed-uram ki su apey ke kedsarig ta ki Hisus wey ke kebpelimlimuey ta ne arà ke iring limbutung ta ne ebpekealang keyta dut te kebpenggeram keyta te datù te pekaid. Ne ke penerengen ta te kebpekeliyu ta rut te kedusa te Eleteala ne arà ke iring sepiyu ta ne putew ne ebmelinew ke itungan ta wey ebpekeiseg ke kebperetiyaya ta. ⁹Su ke Eleteala ne kenà iyan intahù te itungan din te kebpemilì din keyta

ne egkevaluy ne minge anak din apey ki edusaan ketà te kegkukum din en te kelibutan. Ugaid ne iyan din intahù te itungan ne ebpekepeiyu keyta ibpepevayà te Anak din ne si Hisu Kristu ke Kerenan tew. ¹⁰Su sikandin se mibpeimatey mekeatag keyta su misan minatey ki en etawa biviyag ki pà te arà ne hewii te kedlived din kayi, ne ed-ubpà ki riyà te kandin taman te taman. ¹¹Na geina te ini se edtaharan ta, ne beg-eta niyu ke hinawa dut te minge ruma niyu wey petebtevangey kew.

Ke Mewri en ne Pemandù ni Pablo Kandan

¹²Ne ini pà se ebuyuen ku keniyu, minge suled, edati niyu ke minge etew ne egelevek keniyen te keniyu ne pekilukesen. Su sikandan se nepemilì te Eleteala ne ebpenheewit wey ebpenurù keniyu mekeatag te keduma niyu ki Hisus. ¹³Ipekita niyu ke limù niyu kandan wey edati niyu su atag dut te helevek dan. Ne ruma pà ne ebuyuen ku ne petultulengerey kew.

¹⁴Ne ebuyuen ku lavew, minge suled, te suhua niyu ke pehulen ne egelevek. Beg-eta niyu ke hinawa dut te minge etew ne egkeandek, ne tevangi niyu ke minge etew ne melemu ne egkegaga te penggeram dut te datù te pekaid. Ne iyan iya se menanew se kedlalag niyu dut te kedtevangi niyu te minge etew. ¹⁵Embiya ruen ed-ulaula keniyu te meraat ne kenà kew edsuli kandan, ugaid ne iyan niyu ul-ulaa ke engkey se meupiya diyà te langun ne minge etew.

¹⁶⁻¹⁸Na geina te mibpekidseveka kew ki Hisu Kristu ne iyan kiyug te Eleteala keniyu ne merukilem meandew ne ruen kegkehalew niyu, ne layun kew ebpengeningeni, ne piya engkey se egketemanan niyu ne peselamat kew te Eleteala.

¹⁹Ne kenà niyu seelangì ke idsuhù dut te Kedesenan ne Ebpetuntul te Menusiyà, ²⁰kenà niyu sudii ke egkehiyen dut te minge ebpelambas te Lalag te Eleteala, ²¹ugaid ne surimana niyu embiya benar ne ebpuun ini diyà te Lalag te Eleteala, ne dumai niyu ke langun ne meupiya, ²²ne pekeriyui niyu ke langun ne meraat.

²³Ne iyan ku kiyug ne ke Eleteala ne ebehey te kebmelintad te hinawa tew, ne menu ma perem ke editilaken din ke ulaula niyu, ke hinawa niyu wey ke langun ne itungan niyu su apey ketà te kebpekeuma ni Hisu Kristu kayi ne warà igkesawey keniyu su ebmetilak kew riyà te etuvangan din. ²⁴Ne egkeserihan ke Eleteala ke egketuman ini su sikandin se mibpemilì keyta ne egkevaluy ne minge anak din, ne edtumanen din ini se lalag din.

²⁵Minge suled, pengeningeni kew rema te Eleteala mekeatag kenami.

²⁶Ikahi niyu rà diyà te langun ne minge ruma ta ne mibperetiyaya mekeatag dut te limù dey kandan.

²⁷Ruen suhù ku keniyu, su kedserihan a ni Hisu Kristu, te besaa niyu ini se surat diyà te langun ne minge suled tew keniyu.

²⁸Iyan dey egkiyuhan ne ebpeneuven kew dut te Kerenan tew ne si Hisu Kristu.

Arà dà taman.

Pablo